

紀念日

——49歲生日素描

薄薄的日鬚沓沓仔伸勻
透過窗仔門喊阮起床
手面洗淨、心情坐清
目睷巡視線頂舊去的新聞
白茶配餅度早頓
預顛討趁食有賻

昨昏演醫生擔著烏人
偶像劇劇情親像眠夢
收工轉厝免料戲票相送
三招四招，招無愛人仔
做伙欣賞兩月日後
歡喜相逢的齣頭

今日禮拜拍片停睏
金言玉語燒烙陣陣
FB頁面鬧熱滾滾
春夏秋冬轉筵一回
舊年佇台北街頭
永世難忘的歲月

——2015.3.29寫佇赤崁南門仔
2015.6.15《笠詩刊》第307期

刺桐

霜風轉彎剝幹，駛入
赤崁古城年久月深的街巷
老厝門前彼穢雞公樹¹
是Siraya祖先世傳世
強欲予歷史放揀的古董

改朝換代千軍萬馬，革命
相siāng剗甲流血流滴
紅艷的erythros²佇早春開花
嬌媚的體態唱百年的悲意

斯當年拄欲發穎(puh-ínn)的戀愛夢
佇麻達³出陣戰鬥的現實裡
僥得圓滿

刺桐無話無句，猶原
倚騰騰等待青綠

1. 雞公樹：刺桐。

2. erythros：希臘文，紅色，刺桐的拉丁屬名。

3. 麻達：Siraya語，未婚男子。

春風當時入窗？

——2015.4.15寫佇赤崁南門仔
2015.7《台文戰線》第39號

風煙往事

——噍吧哖事變百年回想

咱將記持放空，敢會當倒轉去
前世今生，1915的時空磅空
你講日本大人橫行霸道
共咱的淡薄仔尊嚴因跔塗跔踏
繼落，連基本生存都毋予咱好食暍
按呢，敢無需要佱伊掉跋反

叩、叩、叩、叩——鏘
西來庵的王爺夢裡降旨，喊我
大發慈悲，將五福獻予平民百姓
恁逐家排列排好勢沓沓仔是
一仙(sian)無嫌少一銀無算濟
輕輕仔lok落奉獻箱，靈符隨身
保領眾人消災解厄平安閣順序

彼暝，月色照在小山崙
暗頓半枵餓，阮將怒火暫寄腹內
等待你點著(tòh)引線喝聲號令
殺——！堅凍的空氣殺氣騰騰
巡查喙角油朥(leh)朥攏(láng)褲走敢若飛

派出所的銃枝予竹篙鬥菜刀
剃甲東倒西歪倚袂牢地

剝、剝、剝、剝——閃
恁遮的四跤仔走狗納命來
欺壓善良做惡做毒騎馬碌碡
今仔日，本元帥的大刀無生目睷
來一个剝一个，來兩個剝一雙
護國的心並(phīng)虎頭山較堅定

秋風起勢，滾絞成群結黨的羅漢跤，恁透暝
瘡狗舂墓壙拚向甲仙埔、南莊、大目降
鋤頭、草鏢仔號齊出動，順繼佇警察廳
門口埕搬演規齣宋江陣，想袂到
銃子彈袂過的靈符遮爾無事使(sái)
噍吧哖成做屍橫遍地的塚仔埔

清芳恬恬食三碗公，偷偷仔
絞群助陣，王萊莊好禮款待
大元帥酒醉失手，溝仔尾
鴨母王歷史重演，革命者
相siāng人頭落地，日軍參清兵
全款袂猴癮(giàn)改朝換代

安東貞美¹ 跼總督府曲趺撚喙鬚，大筆一劃
866條人命佇生死簿裡輪迴，好佳哉
天公有目矚，閻羅王只收四分一無命客
彼座關千關萬的百年監獄，被都市計畫
強制遷徙荒郊野外，原底陰暗的門牌號
翻身億來億去新天地

冷雨歇喘，人間來去干焦百年，阮向
眾神下願，願為太平狗莫做亂世民
跋栳閣再跋栳，陰栳、笑栳、
聖栳(siuñn-pue)，機率參天意遏(at)手霸
咱將記持放空，閣一擺倒轉去
前世今生，1915的時空磅空

——2015.5.17寫佇赤崁南門仔
2017.11.5《台江台語文學》第24期

1. 安東貞美：Ando Sadayoshi(1853~1932)，台灣日治
時期第6任總督，任內爆發西來庵事件。

鑼聲

圓形闊面
響亮的聲音
佇遶境云庄現身
參鄉親序大跋感情

鏘！鏘！鏘！
袂輸欲喊醒規座城市
佇大街小巷佾濟濟人群
面對面相閃身

鏘！鏘！鏘！鏘！鏘！
鑼聲跟綴鼓點虔誠舞動
佇雨縫裡一步一跲印
杳杳仔行向光明

——2015.5.26寫佇赤崁南門仔
2016.4.9《中華日報》副刊

美麗春光今何在

——詩話Siraya失落的年代

原底清見見的溪仔水，流東
流西，流入Siraya的相思海
滿山遍野的鹿仔群，走西
往東，佇平埔越跳，Khók-lók
Khók-lók，樂暢自在
檳榔葉隨風飄搖，Sinn-suâinn
Sinn-suâinn，老尪姨點豬
過番仔年，庄裡婦仁人烏裙
素衣，牽出一幅阿立祖
哮海的悲願

倒風內海艫舢連帆，麻達
跤手猛掠，佇海波浪頂面
伸跤出手，標槍相準準
以上蓋飄撇的屈勢離手，拋物線
嬌氣鑽入海裡，連鞭魚蝦水卒
疊若山，黃昏西照日反射水光波影
擺擺¹歡頭喜面，荷跔勻勻仔

1. 擺擺：Siraya語，未婚少女。

退流的沙坪，今暗雙人做伙舞動
熱情的跛步，用開天地以來最溫柔的音聲
哼一曲驚天動地纏綿的戀歌

紅毛仔發動商船優雅探險，荷旗篙
佔地為王，台窩灣的自在風情
予西洋的自信恰火砲關踎熱蘭遮城牆
新港社被懸懸的十字架kiau新港文書
教化降服，麻豆社毋願受番仔契
約束，共荷蘭兵擲落漚汪溪
反腹，變做海龍王招婿的水鬼
鄭國姓鐵殼戰船對鹿耳門順勢
上岸，漢人渡過烏水溝強猛的风湧
死無去的，煞用憊奸巧的計智
將牛皮剪予一絲一絲，絀落
箍圍規片天色漸漸光的美麗田園

佬仔反面無情，喊原底的主人顧寮
做丁，古意的老實人峯酷形對待
並青番閣較青番的隘長夭壽骨
盡展，戇直的少女化身勇士
孤身從入山寨，怒火攻心
兩下手壓霸揣死哭無爸

弱勢族群綴運命走反
盤山過嶺渡河蹠溪
幾百冬天地演變
哀歌無停感氣

Siraya族親漂流四散
歷史冊本毋捌透露
半點仔痕跡，天公有目矚
爲憊滴落血紅的目屎，牽成
萬里外的遊子，一步一跬印
田野調查，小說規縮鄉史
翻轉統治者的白賊話，佇暗淡
無明的時代沓沓仔補記

——2015.7.29寫佇赤崁南門仔
2015打狗鳳邑文學獎台語新詩評審獎
2016.1《台文戰線》第41號

